

Dame i gospodo, uvaženi zastupnici u Skupštini Zeničko-dobojskog kantona , cijenjeni gosti, siguran sam da dijelim vaše mišljenje ako sa posebnim zadovoljstvom i čašću pozdravim sve bivše premijere i ministre dosadašnjih vlada Zeničko dobojskog kantona koji su došli da zajedno obilježimo Dan našeg kantona.

Uz dobrodošlicu ću , bez namjere da ovaj skup opterećujem dugim govorom, napraviti kratak osvrt na aktuelnu situaciju u Zeničko-dobojskom kantonu.

Prošle godine smo prilično skromno obilježili Dan kantona u nadi da će ove godine to biti drugačije. Drugačije u smislu da će u našem društvu biti ostvaren barem malo viši nivo blagostanja. Nažalost situacija nije bitno drugačija od prošle godine.

Nezahvalno je da se osvrćemo u prošlost kako bismo vidjeli gdje smo nekada bili, gdje smo danas i gdje ćemo to biti sutra. Međutim, naša je obaveza da prilikom razmišljanja o sadašnjosti i budućnosti svaki put iskažemo zahvalnost i poštovanje prema onima koji su nam omogućili da danas obilježavamo neke datume, da radimo posao koji imamo. Dalje, obaveza svakog od nas, posebno u zakonodavnoj i izvršnoj vlasti jeste da nam pogledi u prošlost daju energiju i volju , mudrost i znanja da što kreativnije i kvalitetnije gradimo budućnost.

Svako od nas ko je dio zakonodavne ili izvršene vlasti, koji na bilo koji način brine za oko 400 hiljada građana našeg kantona ima pravo da ocjeni trenutačno stanje. To pravo ima i svaki građanin ovog kantona.

Aktuelna situacija koju nam je nametnulo nevrijeme, elementarna nepogoda, gotovo katastrofalna poplava i klizišta posljednjih mjeseci je vezana ponajviše za bavljenje posljedicama. Činjenica je da do sada u našem kantonu, ali i Bosni i Hercegovini nismo imali ovakvo razorno stanje uzrokovano prirodnim nesrećom. Stanje prirodne nesreće koje je pogodilo naš Kanton je situacija u kojoj se do sada nikada nismo našli. Reagovali smo u skladu sa mogućnostima i u datom trenutku odgovorili zadatku prije svega sretni što nesreća nije proizvela ljudske žrtve. Ocjena o tome kako smo se u prvim danima nosili sa posljedicama poplava može biti izuzetno pozitivna. Danas , kada se suočavamo sa saniranjem posljedica ni mi u vladi nismo zadovoljni dinamikom oporavka na terenu koji prije svega zavisi od priliva sredstava koja su neophodna za radove na terenu. Država je u datom trenutku reagovala onoliko koliko je resursa imala na raspolaganju. Ono što je nepobitno je to da smo mi i dalje svakodnevno na terenu zajedno sa lokalnom vlašću i raspolažemo sa preciznim informacijama o načinjenim štetama i prioritnim mjestima na koje trebamo reagovati. Bosna i Hercegovina kao država nije spremna da do kraja odreguje na ovu prirodnim putem izazvanu katastrofu, a kamo li drugi niži nivoi vlasti. U određenim trenucima je bilo dovoljno biti uz stradalo stanovništvo i pružiti riječi podrške. Ponekada svojim prisustvom date ljudima doznajanja da nisu zaboravljeni. Nažalost same riječi neće popraviti uništene kuće, poplavljenje usjeve i uništene škole i druge javne ustanove. U periodu smo kada više ne možemo očekivati pomoć na lijepe oči. Moramo shvatiti da će svako povući sredstava onoliko koliko ima spremnih projekata. Svakako da ima onih sredina koje su iskoristile svoje

kadrovske potencijale i spremno reagovali na ovu krizu. Svima onima koji i dalje misle da će im pomoć pasti s neba poručujem da je krajnje vrijeme da se trznu i da se vrate u realni život. Da imaju spremne projekte kako bi unesrećenom stanovništvu što efikasnije pomogli.

U ovakvom vremenu krize moramo zajedno sarađivati i imati povjerenja jedni u druge. Samo ujedinjeni možemo napraviti daleko više i pomoći našim građanima. Ovo je vrijeme kada sve razlike između nas moramo ostaviti po strani, vrijeme kada svako od nas mora uložiti svoj maksimum i biti na usluzi građanima i privrednim subjektima da saniramo načinjene štete.

Do sada je Vlada Zeničko – dobojskog kantona angažovala 7,1 milion maraka iz budžetskih resursa za saniranje nastalih šteta. Tome treba dodati i 3,7 miliona donatorskih sredstava koja se već implementiraju.

I tu nećemo stati. Koristimo svaku priliku koja nam se pruži da osiguramo dodatna sredstva kako bi život vratili u normalu. Na nama je da osiguramo da djeca redovno krenu u školu.

Svako ko koristi ovu krizu za prikupljanje bilo kakvih političkih poena siguran sam neće dobro proći. Građani prosto imaju tu vrstu sposobnosti da prepoznaju iskrene ljude koji žele pomoći, za razliku od onih koji su tu radi fotografisanja i lične promocije. Još jednom pozivamo sve one koji koriste ovu situaciju u bilo kakve predizborne svrhe da to prestanu raditi. Oni koji to rade makar u svojoj podsvijesti, siguran sam, imaju osjećaj grižnje savjesti što to rade. I siguran sam da od toga neće uopće profitirati. Kao što sam već napomenuo faktor jedinstva jedini može stovriti sinergijski efekat koji nam je potreban za saniranje šteta.

Zeničko – dobojski kantona kao jedan od izvozno orijentiranih kantona nezadovoljan raspodjelom javnog novca mora nastaviti borbu na tom polju. Kao što moramo nastaviti borbu za očuvanje svakog radnog mjesta u realnom sektoru. Privredu moramo jačati kao bi opstali, jer bez jake privrede nema nam ni napretka. Budžetski korisnici prosto moraju imati više razumijevanja za trenutačno stanje kada je u pitanju budžet našeg Kantona. To sada nije slučaj. Uglavnom se insistira na pravima, a obaveze se gotovo zaboravljaju. Uporedimo samo prava i privilegije zaposlenih u državnom sektoru i onih u privredi.

Mi svoje zakonske obaveze nikada nismo i nećemo izbjegavati izvršavati ako smo u prilici da to uradimo. Nikada nećemo dopustiti da se eventualni lični animoziteti, ako postoje, budu prepreka u izvršavanju naših obaveza.

Vlada će, u skladu sa propisanim pravilima i kolektivnim ugovorom koji svakako treba preispitati o čemu su svi saglasni, ali i u skladu sa mogućnostima, ispunjavati svoje obaveze.

Sada mogu najaviti da primanja budžetskih korisnika nisu ugrožena.

Dame i gospodo,

Datum poput ovog kojim obilježavamo Dan kantona je prilika da kažemo i stvari kojima se ponosimo, bez obzira na pripadnost stranci i naciji i bez obzira na probleme sa kojima se suočavamo.

Mi u ZDK zaista imamo lijepe uspomene između dva praznika: to su prije svega medalje naših sportista atletičara Alića, Mileusnića, Tuke, Pezera, sjedećeg odbojkaša Čančara, paraolimpijke Sanele Redžić, džudistkinje Ene Oruč, izvanrednog mladog šahiste Dine Markovića , a ne treba zaboraviti ni izvanredne rezultate učenika muzičkih škola iz Zenice i Žepča koji su sa međunarodnih takmičenja donijeli visoka priznanja u gradove našeg kantona.

Stvaranje što je moguće boljeg ambijenta za ove i mnoge druge talente je naša najveća obaveza. Zadatak pred kojim ne smijemo i nemamo pravo pokleknuti.

Još jednom za kraj želim da vam čestitam Dan Zeničko – dobojskog kantona.

Hvala!